



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim


Instagram tiryimyim@aolima

YouTube tir yimyim

TAPAK 3

Wagner tekolakbai Putin-i
parnok aitsüba magizük

Lok Sabha election nung onoki longjemer
tokteptsü: Mallikarjun Kharge



VOL. XX NO. 252 (ADOK 252) DIMAPUR AMUNGNÜ (SUNDAY)

AAMI (JUNE) 25, 2023

₹ 5.00

Naga nunger shisashirtemi opposition maliba sorkar indang tebilemstsü lemsatep

Kohima, June 24, 2023

(TYO): Honibarnü Naga Scholars' Association (NSA) Kohima Unit ajanga Nagaland nung opposition maliba sorkar indang onük atema olemtep sentong ka ayonga agiogo.

Iba sentong ya Kohima College Kohima nung ayongzüka agi.

Opposition maliba sorkar angatetsü aser opposition maliba sorkar ajanga Nagaland nung alirtem dak kongshiba onüktem benoka lemsateptsü atema iba sentong ayongzük ta NSA Kohima Unit ketdangpur kati ashi.

Iba sentong nung panelists ji-Senior Fellow, Asian Conference, Shillong, Meghalaya, Dr Khriezo Yhome; Assistant Professor, Department of Political Science, Sazolie College, Dr David Sachü; Head of Department of Political Science, Don Bosco College, Dr Tovika Swu aser Advisor NSA Kohima Regional Unit & Nagaland Education Association president Dr Zavise Rume nungertem liasü.

State Assembly nung MLA tem Naga yimten tebilemstsü atema longjemer ta ashi aser nübertemia Opposition maliba sorkar atema tebilemba aika

lemsatepogo.

Nagaland nung tazüngertem aser shisashirtemi opposition maliba sorkar tangatetba junga asadangtsüla aser shisadangtsüla. Sorkar kechaia nübor ajak tebilemba atema menoktaker aser nübertem ola atema opposition bench ka nüngdaker ta tanü panelists-i ashi.

Nagaland nung sorkar akangshitsü atema tashitait opposition ka nüngdaker, ta parnoki metetdaksü.

Nübertemia MLA tem shimtetdang telemtetba tajung agitsüla aser sen mesüra tanga teyaritem agi mesüzükertem tsüngdang melaotsüla, ta parnokisa ashi.

"Opposition maliba sorkar mezüngbubaji Nagaland lir. Anogotem süia arudang democracy mali akümer aser tashitait yimtenren lennirtem adokba ajanga opposition ola mali kümogo" ta Panelist Dr Khriezo Yhome-i ashi.

Nagaland nung political party tem dak ideological politics mali aser iba ajanga dang lokti ajungtsü atema inyaker, ta pai ashi.

"Opposition maliba sorkar ya nükjidong ka yur mapang tatakzük ka atema asütsüla. Naga

MLA temi Naga yimten tebilemstsü tenüng nung ka kümogo, süra Naga yimten latetra parnoki state Assembly anentsü asü?" ta Yhome-isa asüngdang.

"Democracy tenüng nung asenok plutocracy lir aser iba ya takartem yimsü asüba aser sen amshiba sobaliba lir. Asenoki temelenshi ka bener marura aser arokaroka meshisadanga asen tarutsü kanga mejungi akümtsü" ta paisa tebilemba ka lemsatep.

"Nagaland nung opposition maliba sorkar lir saka iba nung lendong keta lir aser democracy atema tayongzükba jenti bentsür arutsü" ta Panelist Dr Tovika Swu-i ashi.

"Assembly nung opposition aliba ajanga dang democracy tetezü ketdangtsü. Asenoki asen otongdar asütsü atema MLA tem shimer saka opposition maliba sorkar ka nung democracy lendongbang nung lir" ta Swu-i ashi.

Nisung aikati political ideology mangateti political party tem nung adener aser talisa Nagaland political party tem dak political ideology mali, ta pai metetdaksü.

"Iba nung tesayurtem aser shisashirtemi nübertem dang democracy aser political ideology angatetdaksütsüla. 2023 elections nung Nagaland nung

democracy süadok kechiyong candidate temi party ana indang ticket atema dang raratep" ta Swu-isa metetdaksü.

"Nagaland nung 1998 nungi opposition maliba sorkar tenzük aser iba sülen 2015, 2021 aser 2023 nunga kasaji atalok" ta Panelist Dr David Sachü-i ashi.

Opposition maliba sorkar ajanga democracy tamendakdak raksatsür. Shitakbabo MLA temi nübertem tsüngdang langzüksüla saka Nagaland nung political party tem indang tangatetba kecha balaka mali kechiyong parnok indang tongtipang alizüngji Naga yimten latetsü atema dang lir, ta pai ashi.

MLA temi nübertem tsüngda langzüksütsüla saka Nagaland nung political party tem tsüngda ideology tsüngda tebandang mali kechiyong parnok ajak indang tongti alizüngji Naga yimten latetsüba lir, ta Sachü-isa ashi.

"2023 general election ama dang inyakdi ta süra election ya selection mode ang agitsüla kechiyong opposition melii democracy junga meinyaktetsü" ta paisa shisem.

"Iba ya political discussion mesüra political argument/debate masü saka academic exercise ka dang lir" ta Panelist Dr Rume-i

ashi.

Opposition maliba sorkar akümiba ya state nung aliba nübor ajak atema noktakba MLA 60 indang tebilemstsü khuret lir. Nübertem maginüka parnoki opposition maliba sorkar aküm, ta Rume-i ashi.

Sorkar indang policy aser program tem asoshi opposition melira, ibaji nübertem asoshi lendong asütsü. Iba ama sorkar ka nung yimsüsürtemi parnoki bilemba ama dang ketsangtsü onütsü aser idangji mepetmesü tulu adoktsü akok, ta pai ashi.

Opposition maliba sorkar ka nung MLA temi sorkar anema menokdaktetsü ta mashir saka sorkar sasep nung internal democratic opposition ka alitsü nüngdak, ta Rume-i lemsatep.

Külen, nübertemia opposition party tem dak dang meimlai sorkari aibelena inyaksangshidang ola adoktsüla, ta paisa ashi.

"Opposition maliba sorkar ka nung ajaki mulungtepa inyaktüla aser party mereprangi tebilemstsü khuret kasasa alemtsüla. Opposition maliba sorkar ka nung party kati dang malenbangtsüla aser nübertemia ola tatoktsü mapangbo adoktsüla" ta Rume-i ayongzük.

India nung ajemi matuba Booster vaccine ka sayaogo



New Delhi, June 24, 2023

(Agencies): Union Minister of State (Independent Charge) for Science and Technology Dr Jitendra Singh-i Honibarnü India nung mezüngbuba mRNA vaccine sayatsüogo.

Gennova ta ajaba indigenous platform technology amshia GEMCOVAC® -OM ta ser vaccine ka yanglutetogo. Iba ya Omicron-specific mRNA-based Booster vaccine lir.

Iba vaccine yangluba nung Department of Biotechnology (DBT) aser Biotechnology Industry Research Assistance Council (BIRAC) nungi senotsü teyari angu ta Ministry of Science and Technology-i metetdaksü.

Drug Control General of India (DCGI)-i tawa tu iba vaccine ya Emergency Use Authorization (EUA) atema temelaba agütsüogo.

"DBT-i ano maneni alizüng tongtetba atema nüma atanger. Prime Minister'er Aatmanirbharta alizüng den putepa 'future-ready' technology

platform yangluba nung onoki teti yaritepa arur" ta Dr Jitendra Singh-i ashi.

Mission COVID Suraksha nungi teyari agia India nung GEMCOVAC® -OM ya vaccine pungububa lir. Iba mapa ya India sorkar indang Atmanirbhar Bharat 3.0 package kübok DBT aser BIRAC ajanga inyaker.

"Mission Covid Suraksha tenzükür küm ka tsüngda alima nung COVID-19 atema mezüngbuba DNA Vaccine yanglutet, linük indang mezüngbuba mRNA Vaccine yanglu aser Covid-19 anema intranasal vaccine candidates aser subunit vaccine yanglutet" ta Union minister Jitendra-isa metetdaksü.

GEMCOVAC® -OM ya thermostable vaccine ka lir aser tanga mRNA-based vaccines ama ultra-cold chain infrastructure menüngdaker.

GEMCOVAC® -OM vaccine ya needle-free injection device system ajanga intra-dermally agütsür.

Amit Shah-i Manipur atema senden ayonga amen; Opposition-i sorkar anaprong aitsür

New Delhi, June 24, 2023

(Agencies): Prime Minister Narendra Modi-i tuyuba ama Manipur nung tensa süngjemtsü atema meranga inyakdar ta Honibarnü Union Home Minister Amit Shah-i ashi.

New Delhi nung all-party senden ka amandang Amit Shah-i iba osang metetdaksü.

"Manipur nung iba tensa ajuruba anogo nungi tenzükür Amit Shah-i Prime Minister Modi den mejembiba mesüra pai (Modi) tetuyuba magütsüba anogo ka danga mali" ta BJP Manipur in-charge Sambit Patra-i senden atemba sülen osangbener dang ashi.

Tanü Opposition ajunga longjemer Prime Minister

Narendra Modi-i Manipur atema ola madokba aitsüogo aser parnoki all-party delegation ka Imphal-i yoktsü takhangba agütsü.

Union Home Minister Amit Shah-i Manipur tensa atema jatepba senden nung Opposition lennirtem aden.

Parliament nung amenba senden nung opposition lennirtemi takhangba balala agütsü aser Congress-i Chief Minister N Biren Singh anentsütsü khangogo. Iba senden nung Manipur CM maden.

Opposition party temisa Centre dang Manipur nung tensa süngjemtsü atema mapang atakzüka yur mapa inyaktü ashi.

Telungpur telok ajak ketnungi

prangpong-injang meshitsüla ta Manipur nung taoba CM Ibobi Singh-i ashi, külen Trinamool Congress lennir Derek O'Brien-ibo Manipur tensa mazüokba tebilemstsü khuret ya state sorkar den külemi Centre-ia abentsü ta metetdaksü.

Congress den külemi RJD lennir Manoj Kumar Jha aser CPI(M) lennir John Brittas nati Chief Minister menden nungi Biren Singh agientsü takhangba agütsü. Maneni, Shiv Sena (UBT) lennir Priyanka Chaturvedi aser DMK lennir Tiruchi Siva nati CM-i tebilemstsü khuret abentsü ta metetdaksü. Biren Singh-i tejak repranga mapa inyaker ta opposition lennirtemi ashi.

Eastern district 6 atema Autonomous Council ka tentetstsü

Dimapur, June 24, 2023 (TYO): India sorkar dang Nagaland nung Eastern district 6 asoshi Autonomous Council ka tentetstsü onük jembitsü atema state sorkari senden ka ayongzükogo.

Iba senden ya June 30 nikongdang 1:30 ako nung State Banquet Hall, Kohima nung alitsü, ta Principal Secretary, Home-i sangdong ka nung ashi.

Senden nung Chief Minister, Deputy Chief Ministers, Speaker,

Ministers, MP Lok Sabha, MP Rajya Sabha, Chief Secretary aser tanga tongti ketdangtsürtem adentsü.

Sorkarisa Advisor tem- Noke Wangnao, K. Konngam Konyak, S. Keoshu Yimchunger, Z. Nyusietho Nyuthe, W. Chingang Konyak, Kiusumew Yimchunger aser Sethrongkyu nung den MLA tem- A. Nyamnyi Konyak, Naiba Konyak, C. Kipilli Sangtam, P. Longon, Jwenga

Seb, Y. Mankhao Konyak, B. Bangtick Phom, A. Pongshi Phom, Y. Lima Onen Chang, Imtichoba, Benei M Lamthiu aser C. Manpon Konyak nung senden nung adentsü mepishia jaokba metetdaksüogo.

Maneni, Central Nagaland Tribes Council, Tenyimi Peoples' Organization aser Tribal hoho 12 nungi Tirtem den teshimtet nübo asemsem iba senden nung adentsü mepishia metetdaksü.

DYRS Advisor-i Jotsoma nung NCC camp semdang



Dimapur, Aami/June 24 (TYO): Directorate of Youth Resources (DYRS) Nagaland Advisor, S. Keoshu Yimkhiung den Wezope Kenye, IAS, Secretary, DYRS aser Kevisevolie Sekhose, Director, DYRS nungeri June 24 nü tang Sazolie College, Jotsoma nung agia aliba Combined Annual Training Camp (CATC-29) semdanga liasü.

Iba camp ya NCC Group Kohima tawabangba kübok 1 Nagaland Girls Batallion NCC-i ayongzüka agidar.

Camp semdangba mapang Instructor Staff aser NCC Group, Kohima nungi takok tajung anguba cadet tem den sensaksema liasü.

Camp semdangba mapang ktdangsurtem ya camp agiba tesem sayu aser camp mapang cadet tem nem training agütsübatem sayua liasü. Tetushi tejaokeri shooting range nung prangbong kashishiba ajangshia liasü.

Assam Rifles Public School, Shillong nung taruba

Inter Group Drill Competition atema Kohima Group tenüng nungi shilem agitsü shimba cadet tem den sensaksema mapang advisor-i parnok takok tajung asoshi tenüngsang agütsü aser cadet tem dang takok tashi shilem tajung agitsü ajangshia liasü.

Kasa mapang nung Col Manjeet Katoch, Camp Commandant, CATC-29-i, Advisor S. Keoshu Yimkhiung, Wezope Kenye aser Shri Kevisevolie Sekhose nunger nem memento kaka agüja liasü.

YBP-i kaketshirtem nem tetushi agütsü



Longleng, Aami/June 24 (TYO): Yachem Böhü Pangthai (Citizens Union)-i tanü NBSE kübok Themmei Phom, HSLC Top 18 aser Baunennyuchong, HSSLC Top 5 (Science Stream) na nem Yachem yimtsüing nung tetushi agütsüba sentong ka ayongzüka agiogo.

Sentong nung Yachem yimtsüing Head Barrick Sangti Phom-i, tatidang nung takok tajung angurtem dang parnoki tanü kechi takok tajung ngutetogo iba ya ano temaba jenjangi ajangketa Yachem, Phom aser Naga nunger atema tajangzük südaktsütsü ajangshi. Paisa, sentong nung shilem agiba kaketshirtem aser nübürtem dang lokti tashi taitba kümdaktsütsü aser kümzüka ayutsü atema takokba tashi bendanga agüja inyaktüsü ajangshi.

Sentong nungsa asür M. Chenlom Phom Foundation tenüng nung Khatak Phom-i o jembiba mapang pai, topper tem tsürapurtem nem tenüngsang agütsü, shirnoki parnok chirnurtem mapang shitak nung aniteta iba alizüing tongtetogo. Paisa, tsürapurtem

dang pei chirnurtem mapang shitak nung kanga junga anepalutsü aser khenübo tongtibang nisung kümdaktsütsü atema anitetsü ajangshi.

Kasa mapang nung Yachem Böhü Staff Pangthai, Yachem Anüti Lunglak (YAL) aser Yachem Students' Union tir temia tajungshi o jembi, kong parnoki takok tajung angurtem nem tenüngsang agütsü aser kaketshirtem dang tali temerangba inyaktüsü aser taküm liba liro jenjangi ajangketa küma ajangketsü atema nükjidong jangja jangja yur tejakdangi aotsü ajangshi.

Sentong nungsa Yachem Council, Yachem Baptist Church, Noksosang Baptist Attoi, Yachem Böhü Staff Pangthai, Anüti Lunglak Yachem & Longleng, Kohima & Longleng Yachem Böhü Unions, Dimapur Yachem Students Union, Mokho Young Club aser Rising Club nungeri takok tajung angurtem nem Lt. M. Chenlom Phom Foundation Award aser Certificates of Excellence and Appreciation agüja liasü.

Topper ana nem kuli kaket agütsüba mapang Yachem

Students' Union-i ano Govt. High School, Yachem nem 100% HSLC result ajangzüksetba atema Certificate of Recognition ka agüja liasü.

Maneni Themmei Phom aser Baunennyuchong napronglai tena atema sentong tajung ayongzüksüba atema Yachem Böhü Pangthai dang kanga pelaba aser lokti tentet balalai temeim sayuba den tetushi agütsüba atema kanga pelaba lemsatepa liasü.

Maneni tenapronglai tsürabur, tesayur, temeimertem dang tena dang temeim sayuba aser tamang katetba atema tenüngsang agütsü aser ajang dang alia takok ajang asoshi tulusang Tsüngrem dang kanga pelaba lemsatepa liasü.

Yachem aser Noksosang Baptist Attoi Church Board temi tena aser tanungba kaketshirtem atema temaotsü aser Tsüngrem lenisüba meshizüka sarasademtsü.

Iba sentong ya Phomlei lenisüba nung agi aser Yachem Baptist Church Pastor Rev. M. Adao-i tenüngsang agüja sarasademer sentong tembang liasü.

Tenyimi Union Nagaland tentetogo

Kohima, Aami/June 24 (TYO): Tawa tentetba Tenyimi Union Nagaland (TUN) ktdangpurtem pelashishia agizükba sentong June 23 nü APO Hall Kohima nung agiogo.

TUN ya Nagaland nung aliba Tenyimi nungertem tsüingda tangatetep tajung tajungba kümdaktsütsü aser longjemshidaktsütsü aser Tenyimi Peoples' Organisation (TPO) tashi taitba kümdaktsütsü nükjidong nung tentetogo

Tenyimi nungertem sobaliba aser oshiooben kasa, azü agi sendaktepa lir aser TUN ajang külemi longjemer inyaksangshiba agi Tenyimi nungertem temaba wazüka ayutsü aser Nagaland nung Tenyimi nungertem ajangshiba arok ken o balala bentetsü, ta TUN-i ashi.

2023-2025 tenure atema shimba TUN ktdangpurtem rongnung; President-Kekhwengulo Lea, Vice

President- Peteroko Zetsuvi, General Secretary- Dr.Tumda Neumai, Joint Secretary- C Pili aser Treasurer- Meshento Apon lir.

TUN Executive züingsemtem rongnung Zeneituo Yono, Zadehol Rikha, Nuzota Swuro, Neilo Khape, Soutsutho Among, Thorapa Kajiri, Er. Gwanyelo Keppen, Khinyi Woch, Neiba Neumai, Heirangyong Lungalang, tir APO, tir CPO, tir Pochury Hoho, tir Rengma Hoho aser tir NZPO densema lir.

Iba sentong ya APO tir Razouvtuo Chatsu lenisüba nung agi aser CPO tir VezuhoK Eyho-i ktdangpurtem metetpelaba mapang agia liasü.

Kasa mapang nung Rev. Dr. D.L Sanchu-i lenirtem atema sarasademtsü aser TPO tir Timikha Koza-i ajangshio jembiba liasü.

Sentong ya TUN tir tasenba Kekhwengulo Lea-i o tatsüka jembiba sülen tembanga liasü.

Elongshila Jamir-i züluba "It Ends to Begin Again" kaket sayaogo

Dimapur, Aami/June 24 (TYO): Elongshila Jamir-i züluba kaket tanabuba "It Ends to Begin Again" June 23 nü DCafe, Kohima nung SAS Nagaland University, Medziphema campus Prof. J Longkumer-i sayatsüogo.

Lai ashiba agi, Elongshila Jamir-i küm ana tsüingda sangro kaket anabuba sayaogo aser iba ya ajangshiba tulu ka lir. Laisa, lanur Elongshila ya lenla ajak nung kanga tesangra aser peisasa dak kanga temulung lemteta alima nung lenmang mesapoka odar, ta ashi.

Publisher Lanusenla Jamir-ia, sangro ajang mejema kaket ajang adokba atema kaket zülur nem tenüngsang agütsü. Laisa, iba kaket ajang lanur kaket zülurtem alima nem metetdaktsütsü atema mesüra pei jangrademtsü atema kaket zülü tenzüksü ajangmesotsü imlaba lemsatepa liasü.

Vizovono Elizabeth,

freelance editor & researcher, aser Dr. Talisenla Imsong, Professor Nagaland University, Kohima campus nati Book review agüja liasü.

Kasa mapang nung kaket indang jembiba mapang Elongshila Jamir-i, kaket züluba mapang lai alima yimayimpong aser meimchir koda mesükteper iba indang bilemdangba lemsatepa liasü. Alima tsüingkü mongpu koda melenshir yamaji nisung taküm nunga kasa temelenshi adoker, ta lai ashi. Laisa koda cycle tembanger aser tenzüksü iba indang lemsatepa liasü.

Maneni lai kaket züluba mapang shirnokisa la nem teyari agütsüogo, parnok ajang dang aser talisa lar tsüraburtem dang kanga pelaba lemsatepa liasü.

Iba sentong ya Konaei Shongdok lenisüba nung agi, Imlisangla Jamir-i ken ajang ka aten aser Kevisede Ti-u-i Tsüngrem temaotsü meshizüka sarasadema liasü.



Nagaland nung mezüing tetsür cabinet minister, Angamitsür Wt. Salhoutuonuo Kruse, par tzülü Peducha nung June 23,2023 nü mo atemba noksa nung angur. Angami nungerbo tulur tilar ajang tzülü ayimer aser parnoki dang inyaker.



June 24, 2023 n New Delhi nung Union Minister of State (I/C) Science & Technology, Jitendra Singh-i coronavirus atema GEMCOVAC-OM Omicron-specific mRNA-based booster vaccine sayatsüdang tangokba noksa nung angur.

India nung auyaba nungo 100 dak tema US-i meyiptsütsü: PM Modi

Washington, June 24 (Agencies): Hokolbarnü Ronald Reagan Center, Washington nung India Ato kilonser, Narendra Modi-i India nung den jembidang India nungi auyaba nungo oset 100 dak tema meyiapa agütsütsü atema America sorkari telemtetba agiogo, ta metetdaksü.

US semdangba sülen tatembangbuba anogo nung America nung alir sensotem den jembidang Modi-i, "Asenok dang nungi auyaba nungo oset 100 dak tema India nem meyiapa agütsütsü atema American sorkari telemtetba agiba atema ni pelar. Item nungo osetji international markets tongadoker liasü. Iba atema ni American sorkar dang pelar," ta metetdaksü.

Ato kilonserisa, "India nung nungo osettemji tim mesüra tim masüba lenmang balala ajanga international market tongadoker liasü, ajisüaka linük ana (US-India)

tsüingda tesendaktep tajung aliba sayutsü mechi nung America-i itemji India nem meyiapa agütsütsü telemtetba agiogo," ta metetdaksü.

"Tesüiba putu aika tsüingda jenjang tasak nungo osettem aika auyaa bendangleni shibelenba liasü; karbo asen sobaliba aser yimsü dak sendakba nungo osettem liasü. India nung nungo osettem aser sobaliba senmangtem meyiapa bener arutsü atema sorkari lenmang bushia inyaker," ta sorkar sangdong ka ajanga metetdaksü.

Bendang linük balala semdangba mapang nung Ato kilonseri lenirtem aser reju balala nung ketdangsertem den iba onük jembiba ajanga nungo oset 251 bo meyiapa bener arugo aser item rongnung 238 bo 2014 küm sülen ang bener aruba lir.

2022 küm nunga US ketdangsertemi nungo oset 307 India nem meyiapa agütsü aser itemji dollar sen million 4 shi

jenjang liasü.

Nungo oset 307 nungjagi teimbaka art dealer Subhash Kapoor ket nungi angu.

Afghanistan, Cambodia, India, Indonesia, Myanmar, Nepal, Pakistan, Sri Lanka, Thailand aser tanga linüktem nungi nungo oset balala shibelenba maparen nung Kapoor-i yaritepa liasü.

India nungi shibelenba osettem rongnung kabo 2002 küm May ita nung New York-i bener ao, iba sülen Kapoor-i Arch Parikara ji Nathan Rubin - Ida Ladd Family Foundation dang ayok, saka Foundation-i iba osetji 2007 küm Yale University Art Gallery nem tenla agüja liasü.

2022 küm kija nunga US-i dollar sen million 84 shi jenjang nungo oset 682 linük 13 nem meyiapa agüja liasü. US nung Antiquities Trafficking Unit tentetba sülen parnoki linük 22 nem nungo oset 2,200 jungnüa meyiapa agütsüogo.

Amit Shah leniba nung Manipur tensa atema party ajak senden amen

New Delhi, June 24 (Agencies): Tang Manipur tensa atema o lemteptsü atema Honibarnü Union Home Minister, Amit Shah-i ayongzükba party ajak senden amen tenzükogo.

Iba senden nungji BJP, Congress, Trinamool Congress aser Left parties densema party aikati shilem agidar. Kasa senden nung BJP national Tir JP Nadda, Meghalaya chief minister

Conrad K Sangma aser CPI(M) MP John Brittas nungera adener.

Taküm May ita tetenzüklen Manipur nung rara adokba sülen Amit Shah-i anogo pezünü Manipur semdangba mapang nung pai yimjung alitsü atema ayongzükba den külemi özüng alema aibelenertem nem temerenshi tulu agütsütsü, ta metetdakja liasü.

May 3 nü rara tenzükba sülen tang tashi nung nisung 120 shi

süogo aser nisung 3,000 dak tema yiruogo. Meitei kini Scheduled Tribe (ST) jenjang akhangba anema Kuki aser tanga minorities-i May 3 nü longkak aيتدang rara tenzükba liasü.

May 3 nü rara tenzükba sülen anogo 50 jungogo, ajisüaka Centre aser state sorkari iba tensa maziüktetba atema Opposition party temi sorkar aija arudar.

ELITE Skill Development Centre
 Lakeview Dimapur : Nagaland
Admission going on for the following courses -

General Patient Care	10th Passed	2 years
Patient Care Assistant / Home Health Aide	8th Passed	1 year

TRAINING will start from 26th June

Lok Sabha election nung onoki longjemer tokteptsü: Mallikarjun Kharge

New Delhi, June 24 (Agencies): Hokolbarnü Bihar yimtiba, Patna nung opposition party tem telongjem senden ka amenba sülen Honibarnü Congress Tir, Mallikarjun Kharge-i, 2024 küm Lok Sabha election nung opposition party ajaki longjemer tokteptsü, ta metetdaksü.

Hokolbarnü opposition party tem senden tembangba sülen lenirtemi, sangküm Lok Sabha election nung BJP anema party 17 longjemer tokteptsü, ta metetdakja liasü.

Kharge-i, "Onoki longjemer tokteptsü. Opposition party ajak maneni Shimla nung adenshia senden amentsü. Onoki maneni raratsü," ta metetdaksü.

Hokolbarnüa osangbenertem den jembidang Kharge-i, "Onok July ita nunga Shimla nung senden mena 2024 küm BJP den tokteptsü atema peipei state nung inyakba dak alia tejakleni aotsü atema asalentong renemtsü," ta metetdakja liasü.

Honibarnü Bihar deputy chief minister aser RJD lenir, Tejashwi Yadav-ia, senden nung adener opposition party ajaki longjema alitsü bangjemogo, ta metetdaksü.

Paisa, "Kashmir nungi Kanyakumari tashi nung lenirtem opposition senden nungji

liasü," ta ashi. Senden tembangba sülen Bihar chief minister aser Janata Dal-United tongti lenir, Nitish Kumar-i, opposition party tem senden junga menogo aser ajak longjemer tokteptsü telemtetba agiogo, ta metetdaksü.

Patna nung ayongzükba opposition senden nung adener lenir 32 ji itemi liasü- Nitish Kumar (JDU), Mamata Banerjee (Trinamool Congress), MK Stalin (DMK), Mallikarjun Kharge (INC), Rahul Gandhi (INC), Arvind Kejriwal (AAP), Hemant Soren (JMM), Uddhav Thackeray (SS-UBT), Sharad Pawar (NCP), Lalu Prasad Yadav (RJD), Bhagwant Mann (AAP), Akhilesh Yadav (SP)

Sitaram Yechury (CPIM), Omar Abdullah (NC), TR Baalu (DMK), Mehbooba Mufti (PDP), Dipankar Bhattacharya (CPIML), Tejashwi Yadav (RJD), KC Venugopal (INC), Abhishek Banerjee (AITC), Derek O'Brien (AITC), Aaditya Thackeray (SS-UBT), D Raja (CPI), Supriya Sule (NCP), Manoj Jha (RJD), Firhad Hakim (AITC), Praful Patel (NCP), Raghav Chaddha (AAP), Sanjay Singh (AAP), Sanjay Raut (SS-UBT), Lalan Singh (JDU) aser Sanjay Jha (RJD) nung nungji liasü.

Dalit nung anema inyakba ken o teimbaji UP nung lir: Ramdas Athawale

Chennai, June 24 (Agencies): Linük nung Dalit nung anema inyakba ken o teimtibaji Uttar Pradesh state nung lir, ta Honibarnü Union minister of state for social justice & empowerment, Ramdas Athawale-i metetdaksü.

Honibarnü Chennai nung osangbenertem senden ka nung tasüngdangba ka langzüdang Union minister, Ramdas Athawale-i, "State tulutiba asünung Dalit nung anema inyakba ken o teimtibaji Uttar Pradesh lir, iba sülen Rajasthan lir. Tamil Nadu nunga Dalit nung anema inyakba ken o aika lir," ta metetdaksü.

"State balala nung item ama ken o kwisa aliar ni mejangja, ajisüaka küm shia linük nung item ama ken 60,000 benoker," ta paisa metetdaksü.

Tawa Tamil Nadu kübok Vengaiyaval nung Dalit nung ajemba tzi nung scü inoktsüba tatalokba nung aibelenertem mapuba dak sendakba nung pai, Union sorakri item ama tatalokbaji tenük yoka repringdar, ta metetdaksü.



Ramdas Athawale

"Union sorkari item ama tatalokbaji tenük yoka repringdar, ajisüaka nüburtem tsüingda yimjung ali nung ang item amaji nokdangtetsü. Tamil Nadu nung Dalit nung anema inyakba atema onoki tebilemstü akar, aser onoki chief minister M K Stalin danga party ajak senden ayongzükba iba tatalokba atema jembitsü tuyuogo," ta paisa shisem.



June 24, 2023 nü Jantar Mantar, New Delhi nung Manipur nung rara anema Manipur nungertem aser lokti tentet balala nungi züngsemtemi longkak aitba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, AAMI (JUNE) 25, 2023

Tanaben asoba

Asenoki amangba Khristan yimsü nung tanaben asoba indang ya ajaki meteta lir saka tanaben asoba takumbo aikati majangshidangi alitsüa akok. Laishiba nung Yohan 3:3 nung Yisui ashiba tanaben asotsü nungdakba yabo theology azungba agi mangutsü aser arogo nung tenzükba agia majangzüksü saka Tsüngrem nem asen tanüla taküm ya bendanga agütsüba ajanga ajangzük. Tanüla nung tanaben asoba yagi asenok tesamatsü lia Yisu Khrista temeim agi asenok kümzük. Aser Pa den tesendaktep yanglur. Ibai taküm nung temelenshi tulutiba asütsü, kechiyong 2 Korint 5:17 nung ashir, nisung kar Khrista nung lira, tetezü shiba tanüla nung tanaben sodir, pa mesüra laji tasen poktetba temang aser tanüla asütsü. Kasa Laishiba jagi ashir, iba nisungbaji tera masü saka ajak tasen kümogo. Aji oda, nisung ka taküm nung kodang Yisu Khristaji pei kibur aser kümtedakba ta kümdaktsüdir, iba jagi pei taküm jakla aser libaliro ajak melenshitsü, anungji pa mesüra laji akhi amato masü saka nisung kenyongi tasen ka amato asütsü. Aji oda, nisungbo kasa dang saka temulungjang aser tekolok kenyongi balaka küma melenshitsü. Anungji, akhidang tamajung bilemba to mebilemsü, akhidang chia ajemba chiyongtsütem to kenyongi sempatsü, akhidang mazüoktetba jaklatem azüoktettsü aser shisabolua aliba taküm to tepela agi asungtsü. Tanüla nung tanaben masodangbo shi taküm nunga tangar dang akseta maksü aser tamakok agi sünger aliba taküm aser kibong asütsüa akok saka kodang asenok tanüla nung tanaben sodir, iba jagi asenok maksü nung akseta aliba tia nungi nümadangdanga alitsüa taküm tasen akümer, kechiyong tanaben asoba ajanga Yisu Khrista temeimi asenok temenentem aika liaka, item ajakji nembanga yutsür. Yohan tapu 3 nungsa ashir, Yisu Khrista alimai aruba ya asenok temenenpurtem aitsütsü aser atakatemtsü aru masü saka kümzüksü aru. Asenok asoshi Yisu Khrista alimai aruba osangtajung mezüngbubaji aji asütsü. Tashitemetter aser ozüng shitak beshiba Nikodemai tanüla tekümtet ya ozüng shitak beshiba aser tenla shitak agütsüba ajanga angur ta bilem. Pa taküm nung tanüla tekümtet angutsüba indang memetet aser majangshii liasü. Alima nung ozüng shitak amshiba kija agi tekümtet aser tepela mangur ta pai memeteti terata nung Yisu Khrista ajuru. Iba aonung Nikodemai tanüla nung tanaben asotsü nungdakba indang angazük. Kasaji tanü asenok Khristan-tem aika tenungbo Khristan saka Khristai asenok mekümsütsü aliba takümtet lir. Tanübo iba ama taküm tiaji khen jungjunga bilemdangdi. Khristan-bo Khristan saka tatem nung Khristai asenok mekümsütsü asenok lira asenok Khristan akümba tajangzükji kechi asütsü? Kodang asenok tanaben asoba Khristan taküm ka alitsü tenzükdir, asenoki temenen mapatem sempatsü aser temenen mapa inyakba nung jangramatemtsü. Joko, tangbo asen taküm ya asensasa masü saka tanüla temeshii anitsü. Aji oda, asenok dak tamajung aliba jaklatem ajak melenshitsü aser asen agi asen memesük akümtsü. Atangji, iba ama taküm tasen ka ngua tangari süngmangtsü. Iba ama temelenshi taküm kaji nai nüsasa ajangshidanga lir mali? Naia na Khristan ka ama Yisu Khrista den tesendaktep alibaji meteter asü? Atangji, asenoki asensasa asenok ya Khristan tajung ka ama bilema alitsüa akok saka asenok taküm yimya nung tangari asenok dak Khrista akaba jakla balaka reprangtettsüa mali tashi asenokji tanaben asoba taküm masütsü. Tanaben asoba aser masoba na taküm kasa asütsü makok. Shibasa tanüla nung tanaben soogo aser shibasa Khrista nung tasen kümogo, pa mesüra lajibo tasen poktetba ta shia alinung, kasa tejen taküm asütsü makok. Tejen o tasen na balala, anungji asenok taküm tasenbaji tangari reprangtettsüa alibaji anogo shia asenok mapa inyakdak tangar tsüngdang asenok taküm kuli asütsü.

OLEMSABANG

TEMENEN MENABA YA SENMANG AMANGTEPYONGA AOR

~ L. Kika Pongener.

Ezekiel-18:2. "Tsürabur-i tsükmenatsü tasen achi aser chirnur tepu mejemer "Tsüraburi temenen mena aser iba temenen jagi chirnur tepu mejemer. Temenen menaba teraji senmang amangtepyonga maneni aotsü.

Aiat-5:7. Ozü tsürabur-i temenen mena, aser joko parnok mali; aser onoki parnok tai temenen khu abener.

Lipok-3:6. Adam o Eve nati temenen tatidang nung tsük. Aser iba temenen tera maneni oa par kibong nung tansutsü temenen tulu ka atalok. Kain-i tenu Abel anema tenukmerem mokokachi adoka pai tenu Abel tepsettsü mapayui tepset (Lipok-4:3-5). Kibong nung temenen tera yanga mayutsü kanga dang kümdangtsüla.

Lipok-12:1-5. Tsüngremi Abraham dang Haran lima nungi Kanan limai oang ta ashi, aser pai Tsüngremi ashiba anga-a apuso. Kodang Kanan lima Efrata ta ajaba yimti atong, iba lima nungji ayawara tesashi ka liasü. Anungji Abraham-er kibong ayawara nungi jena lji limai ao. Ajiser, Abraham-i tebuttsü Sarai mechi lji chuba tang tiyazü jemia temenen mena. Yongji, Abraham'er semchir Yakob'er kibong ayawara nungi kümzüksü meji lji limai aotsüa tensa mapangi bentsür aru. (Lipok-12:10-13). Ano putu aika sülen Yosef o Mari na kinu Yisu anir, Herod chuba dang nungi jena lji limi aotsüa tena mapangi bentsür aru. (Mathi-2:13). Tajung suaka tamajung suaka., tetsü-tebou aoba tsüngsu nung par semchirtema aotsüa tensa mapangi bentsür arur ta asenoki iba otsü nungjagi angur.

Lipok-16:2. Tsüngremi Abraham dang Jabaso ka moatsütsü aser na kin jenti tebu kümdaktsütsü ta nangzük, saka aji matateti Abraham kinungtsü Sarai kilitsür Hagar den medema tanür asotsü ajongshi aser Abrahami tashi anga-a inyak aser Ishmael aso (Lipok-16:1-5). Tsüngrem'er sentong matatet aibelen nungji, Ishmael aser Isak na meputepi senshiba tena dak nungi jakzükba semchirtem Middle East nung tanü putu tashi tongpang rara manener.

Lipok-27:1-10. Isak'er kibong nung par jabaso Yakob-i tedi Esau tambu senmang rakzükba mechi rara adokbaji tena tai masü, saka Isak o Rebeka na tai liasü (Tsürabur tai). Isak o Rebeka nati Esau o Yakob na bendanga meim (Partiality), ibajagi Esau o Yakob na tsüngda tsükchitepa raratsüsa temenen tera tenzükdaksü (Lipok-27:1-10). Anungji iba temenen tera-ji tanü asen putu tashi Esau dak jakzükba Edom kin aser Yakob dak jakzükba Israel kin tsüngda raraba manener.

Lipok-27:1-10. Yakob-i tebu ashiochtsür tambu senmang rakzük, anungji iba aibelenba temenen yong pa-a teko Labani aiben ashiochtsü. Aji dang masü pai kanga meimba jabaso Yosef tedi nungeri tangar kin dang alar asütsü ayok, aser shirurui tepset ta tiyazü osang bener arua pa ashiochtsü. Yamaji pai tebu ashiochtsüba mechi par chirtem-ia pa ashiochtsü. Aseni tera yanga ayuba temenen jagi asen chirnur-semchir tashi kangshitsü.

2 Samuel-11:2-5. Dawid chubai par sepoy Uria tongpang nung tepsetdaksür, tebuttsü Bathsheba pa kinungtsü asütsü agi (2 Sam-11:15). Iba temenen tera par kibong nung, jabaso Amnon-i pei aianu Tamar den nuktapangda beshi, aser iba mechi Absalomi tenu Amnon tepset (2 Sam-13:14 & t.30). Ano Dawid'er jabaso Absalomi tebu den chuba menden raktepa apuso. Dawid-i Uria tepseter tebuttsü agiba, iba temenen tera par kibong nungi nok mainshi, azütokshiba manen, aser tansutsü maaksutsü mapa tulu par kibong nung atalok.

1 Chuba-11:1-13. Solomon chubai Tsüngremi pa moatsüba ama-adoker, bendangtsür aika agi aser sungyanglu külema Tsüngrem nungi pilaa ao. Anungji par chir Rehoboam mapang pa chuba yimli ana küma lemsa. Tsüngremi Solomon chuba kanga ajungket, saka Solomoni angaka oa Tsüngrem nungi pila. Yimsusur shirnoki Tsüngrem jashidakja aibelendir Tsüngremi iba yimli-ji lemsatsütsü mesura laodaktsütsü.

1 Samuel-2:12-22. Eli Putir jabaso Hofni aser Finehas tenati tenladak sabang nung chiyungtsü rakzuka achi aser sentep suki kiküm nung inyaker tetsürtem den nuktapangda beshi. Putir ka ser Eli-i par jabaso ana mazüoktet tekülemdak suki menendakja Tsüngrem jashidaktsü. Anungji Eli Putir kibong nung arishia tambur küma shinga malitsüsa Tsüngremi atakatem agütsü (2 Sam-2:31). Ano aji dang masü Filistia nunger den tongpang raradang Eli'er jabaso Hofni aser Finehas anogo ka nung külemi tsükchiri tepset, aser iba osangji angashir, Eli Putir pa amenba menden nungi tsüker tekong raksa aser asü (1 Sam-4:17-18). Tsüngrem tenzükertem pei kibong jungjunga yimsu mesutetra aser chirnur mazüoktetra Eli Putir kibong nung atalokba ama ataloktsü.

1 Chuba-21:1-14. Ahab chubai Nabot'er tsükmenatsü lu agitsü mechi, pai tebuttsü Jezebel tasa nung Nabot lung agi onseta sudaktsü, aser par tsükmenatsü lu tashiyim agi rakzuka agi. Anungji Tsüngremi Ahab chuba dang kanga jashi. Ahab chubai Nabot tepset aser Nabot zü (Blood) azüi menak, saka iba küsa azü (Dog) jagi Ahab chuba aser pa kinungtsü Jezebel zü-a menak. Aser Tsüngremi Ahab nungi tebur chanu ajak lepdok, oda nu menden nung aliba dena ajak leptok (1 Chuba-21:21). Shirnoki pei ket nung tashi (Power) aser rongsen lir...ta ser tashiyim agi tangar meyong rakzuka agir, nisung tepseter, tangar mezüngmeshir, parnok daka küsaji ataloktsü. Temenen menaba teraji chirnur-semchisemnur tashi maneni senmang amangtepyonga aotsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



(Abelen nungi) 1878 küm Rev. Dr. E W Clark-i Molungyimsen nung atemba litchidong aser June 23, 2023 nü Molungyimsen Baptist Church kübok Molung Mission Board ajanga anepalua ongzüker nüburttem nem lema agütsüsü asoshi bendena aliba litchi süngjang angur. Kümshia Molung Mission Board-i acha-ayanga iba süngdong nungi süngjang ongzüker mission mapa balala inyaka arur.

Africa aser Asia nung 'Let There Be Lite' Bible App tenzükogo

June 24, 2023: Smartphone aser internet connections alirtem aika Bible Apps ajanga Tsüngrem O meteta kanga temoatsü angur, ajisüaka internet connection junga maliba tesemtem nungbo Khristantemi item apps mamshitetba osangtem angashiba sülen tawa YouVersion Bible app-i Bible App Lite tenzükogo; iba app amshitsü atema internet connection menügdaker.

Sub-Saharan Africa aser Southeast Asia atema balaka design asüba Bible App Lite ya 'space-saving app' ka lir, anungji iba app khen downloaded süra offline ajanga amshitettsü.

Iba app nunga YouVersion indang tongtibang features-Bible reader, audio Bibles, anogo shia azüngtsü Lai tekongtem aser sarasadem onüktem densema lir.

Tang tashi nung nisung million 4 dak temai Bible app lite version download süogo aser Africa kübok linük 17 nung Google Play store nung top 10 nung lir aser Kenya, Uganda aser Democratic Republic of Congo nungbo temaba jenjang nung lir.

Alima tesem aika nung

nisung billion aikati broadband internet mangur. Mobile broadband jenjang ajema kümdar ajisüaka Africa nungbo tesem aika nung broadband mangur.

Jila aika nung internet connectivity lir saka Africa kübok yimtsüngtem nungbo tang tashi internet services mangur, ta St Paul University nung lecturer aser Kenya nung pastor, Kevin Muriithi Ndereba-i metetdaksü.

Osangbener den jembidang Kevin-i, online ajanga sayutsüngi onüktem, Bible plans aser Bible commentaries angutsü kanga tasak, ta ashi.

Paisa, pai Bible podcasts angur, saka aiben timtem ajangshir, ta ashi.

Kevin-i pastor tem dang, pastor mapa atema internet connection nung dang memetaloktsüla; technology tools majungba atema mejashitsüla, ta ajungshia liasü.

Africa nung Khristantem atema ministry balalai Laishiba resources agütsür; radio aser TV broadcasts, audio Bible players aser e-readers ajanga Laishiba resources agütsür.

YouVersion-i Bible App Lite

ya yaküm Africa nung mezüng tendanga liasü, aser iba app amshirtem dang nungi telangzüba tajung nua liasü.

YouVersion-i global Bible ministry Biblica den senteper lite app ya yanglu.

Biblica nung tatong Tir, Mark Finzel-i, "Terenlok alima limatem nung asenoki internet jangratema amshir aser app kobai internet data kwi agir ta asenoki kecha masadanger. Ajisüaka terenlokdam limatem nungbo yamaji masü. Internet speeds aser jenjangji linük shia nung balala," ta ashi.

Paisa, "Iba app amshirtemi mobile data menügdaksü," ta metetdaksü.

Bible Lite App ya Africa nung dang masü saka Asia kübok India, Nepal, Pakistan, Myanmar aser Bangladesh nunga tenzükogo aser maneni ano linük aika nung tenzüksü.

YouVersion tenzüksang aser CEO, Bobby Gruenewald-i sangdong ka ajanga, "Onok tejangrabaji, alima tesem ajaklen nisungtemi pei oshi nung Tsüngrem O züngtetdaksütsü atema lir. Tang iba app tasenba ajanga ano nisung million aika ayimjemtsü," ta metetdaksü.

Kenya nung Khristan aika asüba ken o nung tai tonglokja alir ka asü

June 2024: Kenya nung Khristan aika lumia asüba ken o dak sendakba nung tai tonglokja alir kati tepuokdak anogo 10 tashi lumiba sülen süogo.

Kenya nung Khristan 337 shi arem nung lumia sarasademang asüba ken o dak sendakba nung Good News International Church nung pastor, Paul Mackenzie densema nisung 30 pua lir, ajisüaka Joseph Buyuka-i tepuokdak lia anogo 10 tashi lumiba sülen asü.

"Good News International Church nungi züngsem aika Shakahola arem nung lumia südaktsüba aser ozüng alema ali

nung aremba tatalokba nung parnokia (Buyuka den tangar pezü) shilem agia lir ta police-i bilemer," ta court documents nung shia lir.

Taküm April ita nungi tenzüka ketdangsertemi iba arem nung tasümgang aika ali nungi tuteta arudar.

Prosecution counsel, Jami Yamina-i, "Anogo ana tejaklen Mombasa yimti nungi kilometer 116 shi pilar Malindi jila nung aliba hospital ka nung Buyuka süogo. Pa jail ka nungi hospital jagi anir oa liasü," ta metetdaksü.

"Pai chiyungtsü mechii lumiba ajanga asü, ajisüaka post temtem

agiba ajanga dang osang tejangja metettsü," ta Yamina-i court nung metetdaksü.

Taoba hopta nunga Kenya nung Kilifi County kübok Shakahola arem nung ano tasümgang 19 ali nung tutetogo aser ibaji densemabo tang tashi nung asürtem 330 shi jungogo. Iba dak alia nisung 600 dak tema samar mangur, ta regional official Rhoda Onyancha-i metetdaksü.

April ita nung pastor Paul Mackenzie-i pa sülen anidakterem dang, lumiseta asüba ajanga alima tatembang anogo matongdang nenok tama kodaki aotsü, ta ajungshia liasü.

KBPF-i Kohima nung Manipur atema sarasadem sentong ayonger

Kohima, June 24 (TYO): Kohima Baptist Pastors' Fellowship (KBPF)-i June 25 (Amongnü) nikongdang 6:00 ako nungi NBCC Convention Center, Kohima nung candle light service agia Manipur tensa atema sarasademtsütsü asoshi sentong ayongzüker, ta KBPF

Tir Rev. Vezopa Rhakho aser tongti tezülur Dr. Roukuovilie Sachü nati sangdong ka ajanga metetdaksü.

Iba sentong nung Manipur nung yimjung atema sarasademtsüba den külemi rara ajanga kongshibapurtem atema sarasademtsütsü aser

tang ama tensa ka nung timtemba Khristantem tejashi lemsateptsü atema iba sentong ayongzüker.

KBPF-i denomination balala ajak nungi Khristantem dang arua iba sentong nung shilem agitsü mepishia metetdaksüogo.

ANO GO ABEN TSÜNGREM DEN

NE DAK REPRANGANG

"Nisungi pei sasa aridangang.. Saka asenoki asenok sasa shisadanga, asenok o mebendangtsüla Kor. 11:28-31

Korinth Arogopur Kibuba benjong agitsü sentepdang, parnok rongnung tim mastiba mapa bensi. Yi mesepba, raraba, timi melemsaba aser iba tebilemtsü adok aser ibaji temoatsü masü tai ang inloka aser tasüba ajuru. Anungji tai mangutsüsa pei sasa tendangtsü Pauli Korinth nung dang ashi.

Kechi mapa nung südir süaka pei sasa asadangtsü nungdaker. Business company tulu aser tila, telok balala ajaki ya inyaker, kechiyong koba tashi takok aser tamakok angu aser tarutsü mapang koba leni aotsü iba ajanga meteter.

Arogo, kibong aser Khristan taküm asoshi asadanga ya kanga tongtibang. Ya melira aiben mashileni aotsü, Tsüngrem tsüngdang tai menatsü, aser tamajungba nem kokdaksütsü.

Israel nung, lgip nungi adokdang mapang ajak nung Tsüngremi kechi koda ani, moatsü aser tashi mangaba ajanga merenshi meyipa reprang aser tarutsü tenangzükba aser temoatsütem indang lepshia bilemtetdaksü. Ibaji ajanga parnok kümdangdaksü aser shitakba lenmang nungji jaja.

Tanü asenok pei taküm meyipa repranga asadangtsüla. Tai kar lira metongshitsü aser indanga yanglur odi.

Oba, tindanga lenmang kü dang sayuang. Amen.

Nisung kati 'Doric' oshi nung küm 17 agia Laishiba ajak meyipzük



Gordon M Hay-i meyipba Tasen Lai aser Tejan Lai kaket sayuba noksa nung angur.

June 24, 2023: Nisung kati küm 17 agia Doric oshi nung Laishiba ajak meyipzükogo; iba oshi ya Mid-Northern Scots oshi lir.

Inverkeithny, Banffshire nung aluyimer kibong ka nungi intetsang, Gordon M Hay-i tesüiba küm 17 Laishiba meyipa liasü. 2012 küm tashi nung pai Tasen Lai ajak Doric oshi nung meyipzük aser tawa Tejan Lai-a ajak meyipzükogo.

Arrshi küm 77, Gordon-i tamalena kaket aika Doric oshi nung meyipzükogo. Pai inyakba mapatem rongnung 2016 küm Aberdeen nung conference ka atema Charles Dicken's kakettem meyipzükba densema lir.

Pai meyipzükba Tejan Lai

ajakji kaket tapak 758 lir aser ojang 570,000 dak tema lir.

2010 küm nungi tenzüka Gordon-i pai meyipzükba Laitemji Glasgow nung aliba Scotland Arogo ka nung pastor, Rev. Melvyn Wood nem reprangshidakja aru.

Presbytery of North East & Northern Isles nung Clerk, Rev. Sheila Kirk-i, "Tang pai Lai meyipzükba ya north east nung alirtem atema kanga tongtibang mapa ka inyaktüsüba lir. Iba ya ajanga Gordon-i pai jembia aruba oshi kanga meimba, iba oshi junga meteta aliba aser junga angatetba shisanger," ta metetdaksü.

"Gordon ajanga onok kanga nüma atanger," ta Rev. Sheila-isa lemsatep.

AO OSHI ANGAZÜKDAK: TANÜ ANGAZÜKTSÜBA OJANG



Ratep

(adj) tzunglu kanga aruba, tsüngsang kanga majung (Raining whole day)

* Tsüngsang ratep nung aremi maor.

Ratepkin

(n) alima kin balala temeyoktep (mixture of different races)

* India ya ratepkin agi akümba alima ka lir.

OLONG PAITEP # 6556

Grid for crossword puzzle #6556 with numbers 1-24.

TIPIEN

- 1. Saku - (4)
6. Songjen - (7)
7. Mali/Tazung - (4)
9. Tasen apok - (6)
11. Songtem - (3)
13. Ata liasü - (5)
16. Tzunglu den külemi tsüker - (3)
17. Aso tila - (6)
20. Tashi maküm - (4)
24. Tenung kasa jatepba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anungdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. _ _ _ tatsü - (3)
12. Tebur kidong aser zünga kasa tsungda jatepba - (4)
14. Pela agizükba tapu ka - (5)
15. Tenung atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6555 TELANGZÜBA

TIPIEN :

- 1. Meyi, 6. Shin, 7. Yimkong, 9. Tera, 11. Teberem, 12. Anem, 15. Senmang, 17. Tenü, 18. Anep.

LANGTSÜNGLEN :

- 2. Yim, 3. Tanü, 4. Shilem, 5. Ano, 7. Yakta, 8. Kilem, 9. Tenem, 10. Amang, 11. Tenung, 13. Mela, 14. Ita, 16. Ain.



MINISTER ALOKBA MEETINGI MENUR ARUR:

Kanga tip matem, ochi mashi tantsür kati mapang shia bazaar nung auya. Künü anogoji lai oset kar auyabayong bazaar committee-i pua court nung agütsü.

(Court nung)

Obendanger: Tantsü, nai kechiba, kechi auya shiang.

Tantsür : Sir, ni kanga ayaba agi auya aser ni titi secret ka shi auyaogo.

Obendanger: Titi secret ka nungji titi kwi liasü?

Tantsür : Titiji tila dang asüba agi tenet liasüa.

Obendanger: Ümmm, na tantsür taji titi shiaji anogo kaka, anogo tenet tepuokdak alitsü.

Tambur ka : Sir, ni ya la kinungbu, nia langka shidangni ni?

Obendanger: Shiang.

Tambur : La yagi ano Dal kg ana auyaogoti, ajia züngdangangma!

- Lilir : WhatsApp

Tipra Women Federation-i Kokborok oshi atema Roman script meshir

Agartala, June 24, 2023

(Agencies): TIPRA Motha indang tetsür kongsang Tipra Women Federation (TWF)-i June 24 nü sentong tulu ka ayonga agir Raj Bhawan Abhiyan agia tembang.

TWF-i Kokborok oshi atema Roman script mapa tenzüksü takhangba agütsüba memorandum ka Tripura Governor Satyadeo Naryan Arya nem agütsü.

Iba sentong ya Vivekananda Maidan nungi tenzük aser circuit house nung anenzüka shilem ka agi. Ajisüaka police-i VIP road tsütsü meyoktsü atema lenmang shibangba ajanga atsüdang TWF züngsemtemi raratep saka tensa tamajungba mekümi azüoktet.

Bongaigaon district nung lanur ka ULFA (I) nung aden

Guwahati, June 24, 2023

(Agencies): Assam kübok Bongaigaon district nungi lanur ka United Liberation Front of Asom (Independent) nung denogo.

Iba nisung ya Momen Nath ta jangjaogo aser pa ya North Boitamari nungi lir. Pai social media nung video message ka ajanga ULFA (I) nung adenba osang metetdaksü.

Pai par jala, kinungtsü aser kinungertem kümzüka ayutsü atema ULFA (I) nung aden ta ashir.

Taküm March ita Tinsukia district nunga lanur ka samar bushitepdang pa ya ULFA (I) nung züngsem aküm asütsü akok ta temulung melemi liasü.

Iba nisung ya Bordumsa nungi lir aser par kinungertemi police station nung missing complaint ka benok.

2021 küm pa tebu tepsetba ajanga pa tekolok nung timtem adok aser iba ajanga tim masüba lemtet agi ta bilemer.

"Roman script akhangba ya tanü tasen masü saka iba atema ashishitep onük aika adoka lir. Governor-i iba ken o ya pa indang ama bilema lemtet ka agütsü" ta TWF lennir Geeta Debbarma-i ashi.

Iba rally agiba sülen züngsem 5 agi akümba TWF teshimtet telok kati Tripura Governor Satyadeo Naryan Arya den ajurutepa memorandum agütsü.

"Tripura indang official state language 'Kokborok' ya state nütsüng yongsük 31% temai jembir. 'Kokborok' ya küm 5000 tain lisopur oshi ka lir aser iba ya lisopurtem indang sobaliba aser maitsü nung tongtipang shilem ka lir. Tia maka lemtet tai kar ajanga iba oshi ya tanü samaa aotsü tia ka nung lir" ta

TWF-i memorandum nung zülua lir.

Iba oshi indang original script Koloma samaogo aser tanü Kokborok jembirtem asoshi Roman script ya tajungba ta bilemer. Sorkari nübertem taginüba magizükba atema jashir aser parnoki Devnagri mesüra Bengali script amshitsü rongshir. Oshi ka renloksüba nung script ya kanga tongtipang lir aser iba ken o ya tesüba küm 40-50 tashi Tripura nung kanga jembia arur, ta parnokisa metetdaksü.

State sorkari Bhasa Commissions mesüra Committees 3 tashi tenteta mapa inyaktaksü aser parnok ajaki Kokborok oshi atema Roman script amshitsü pusema nungit ta TWF-isa ashi.



OFFICE OF THE Aoyimkum Village Council

DIMAPUR DIST. : NAGALAND Regd. No. Cab. 13/17/83. (Vol-11) Date: Kohima 17th May '88 P.B.O. 246

SANGDONGER

Aoyimkum yim süngküm kübok temzüngi memelaba mozü (Sunflower drugs) ayokba aser achiba atema teküpoklen agüja aliba züngsemtem temelenshiba kuli tejangja tajung mangu tashi yimtsüng nungi atsüngdaksüa atar.

- 1. Mr. Shiluakum, s/o. Lt. Limanungsang, Nokpu village.
2. Mr. Moayanger, s/o. Mr. Imnawati,, Moayimti village.
3. Mr. Imlitoshi, s/o. Mr. Imlisunep, Chuchuyimlang village.
4. Mr. Shilusangba, s/o. Mr. Tekameren, Khar village.
5. Mr. Wati, s/o. Lt. B.B. Thapa & Lt. Alemia (Chungtia village).
6. Mr. B.Supong alias Mr. Apong, s/o. Mr. Bendangniken, Changki village.

(Imchamba) Chairman Aoyimkum Village Council Dimapur : Nagaland

(Putunungsang Longkumer) Secretary Aoyimkum Village Council Dimapur : Nagaland

(Nungsangtoshi) G.B. Aoyimkum Village Dimapur : Nagaland Regd No. 519/DC/DMP

Meira Paibi nungeri 'No Separate Administration in state' ayimoktsür



Imphal, June 24, 2023

(Agencies): Local clubs aser Meira Paibi nungeritem Manipur tesem balala nung 'No Separate Administration in Manipur' takhangba agüja lungkak aiter.

Meitei nunger ya yimjung meimertem aser kin shinga anema menoktaker ta Apunba Meira Paibi Lup Keishamthong züngsem Thokchom Chandrasakhi Devi-i ashi.

Kuki telungpurtemi ali aginüba ajanga tanü iba tensa ajurua lir. Meitei nunger kümzüka ayutsü atema onoki yimya balala agi lungkak aiter, ta lai ashi.

"Kuki telungpurtemi ali aginüba ajanga iba tensa ajuru. Anogo ishika tejakdang media houses kari Churachandpur district nung ali rakzükba atema Kuki telungpur telok ana raratepba osang adokogo. Iba ajanga parnoki ali kanga aginüba sayur" ta Devi-i ashi.

Manipur nung kin balala temeyoktep lir saka tia maka kin ka dak alaka tanga kintemi Manipur kümzüka ayutsü atema tejakleni marur, ta laisa metetdaksü.

"Meitei nungeri dang Manipur loka meyoktsü atema

kümzüka ayutsü asü? Kin kati state longjema aliba raksatsütsü merangdang kechiba tanga kintemi ola madoker?" ta laisa asüngdang.

Manipur nung MLA tem tsüngda telok balala tentetba aitsür, ta Devi-isa ashi.

"Manipur nung security forces aika mapa lemezükja lir saka parnoki National Highway 2 melapokteter. Parnoki tensa mazüoktetra kechiba parnok Manipur-i yok. Parnok ya lendenlen alirtem alenbangtsü atema yokba asü?" ta laisa asüngdang.

Wagner tekolakbai Putin-i parnok aitsüba magizük

Moscow, Aami/June 24 (Agencies): Russia nunger indang military contractor Wagner Group tekolakba Yevgeny Prigozhin-i, tir Vladimir Putin-i parnoki Russia ashioxtsüogo ta ashiba magizük.

Par sepaitemi, shirnoki parnok nokdangtsü merangdir parnok ajak den raratsü nangzüker Ukraine nungi arrtsü nung aliba Russia yimti Rostov-on-Don-i aiba sülen Putin-i parnok aija liasü.

Honibarnü Prigozhin-i social media app Telegram nung audio osang ka lemsatepogo aser ashiba agi, par sepaitemi yimti nung airfield densema military facilities tem aziökogo.

Russia indang TASS news agency densema online nung video aser noksa balala lemsatepba nung prangbong hadir teperi bener aliba sepaitemi Rostov nung administrative building tem meketbanger aliba aser yimti teyongi tank tem yoker aliba nguogo.


"Onok ajak asütsü renema lir. Onok 25,000 aser tanungba 25,000," ta pai ashi. Taoba mapang pai Ukraine nung parnok indang camp amakba atema Russia nunger lenirtem aitsüba sülen iba jenjang agia liasü. Parnok ya Ukraine nung Moscow atema rarar.

"Onok Russia nungertem atema asür," ta pai ashi.

Honibarnü Putin-i tv sangdong ka ajanga, Wagner teloki praongbong hadir balala bener nokdakba ya tashioktsüba ka lir aser shirnokisa Russian military anema prangbong hadir bener nokdakdir parnok merengshitsü, ta ashi.

Paisa, Russia kümzüksü atema pai kechi südir süaka inyaksü aser Rostov nung tensa aziöktsü atema jenjang tapet ka agitsü, ta ashi.

Federal Security Service



Vladimir Putin

(FSB)-i ashiba agi, Prigozhin inyakyim ya Russian Federation litsüing nung prangbong hadir bener nokdaksü atema tayongzükba ka lir aser profascist Ukraine nunger sepaitem ashioxtsüba ka lir.

Iba dak sendakba nung Russia nunger ketdangsürtemi ashiba agi, tesem balala nung security akangshioogo aser Moscow mayor-i linük yimtiba nung kiralongrar anema jenjang tapet agiogo.

"Moscow yimti aser Moscow temeket nung kiralongrartem inyaksangshi nokdangtsü atema jenjang tapet ka agiogo," ta linük national anti-terrorist committee-i metetdaksü.

Kasa mapang nung Russia defence ministry sangdong ka ajanga ashiba agi, Wagner teloki parnok ashioxtsüogo.

Ken o dak sendakba nung tir Volodymyr Zelenskyy-i ashiba agi, prangbong hadir bener nokdakba ya Russia yimden yimsüsüba tamendakdak tashi maitba indang kuli lir. "Russia tashi maitba iba ajanga sayur. Russia nungeri parnok sepaitem aser mercenaries tem onok ali nung kobika yudir papikaji mepetmesü, tashiba aser tebilemstü ajangshitsü," ta Zelenskyy-i ashi.

Russia nunger

ketdangsürtemi Prigozhin anema criminal ken o ka benoktsü ta ashiba sülen Prigozhin-i inyakyim balala benoka inyaka aruba nung Rostov amakba ya tesüsaba asütsü. Prigozhin-i linük defence Minister Sergei Shoigu agintsü ta ashiba sülen pa amokmerena liasü.

Hokolbarnü Prigozhin-i, Ukraine nung Wagner indang field camp tem rocket amshia amaksü atema tetuyuba agütsüba atema Shoigu aitsüogo.

"Onok sepaitem aika tepsetogo. Linük indang military lenirtemi iba amala inyakyim tamajung benoka inyakangshiba ya anendaktsüsüla. Parnoki sepaitem taküm mapayur. Parnoki ochi obendang ta asüba ojang amatokogo," ta pai ashi.

Prigozhin-i ashiba agi, rocket agi camp amakba sülen sepaitem 2000 tepsetogo ajisüaka pai kuli tejangja magütsü.

"Onok 25,000 lir aser onoki linük nung kechiba iba mepetmesü adoker aji bentettsü merangtsü," ta Prigozhin-i ashi aser iba ajanga pa ket nung sepaitem talila aliba aser military züngsemtemi pa nongita yariba sayur. "Shirnokisa dener ajak pelashishia agizüktsü. Iba inyakyim ya tembangdaksüsüla," ta pai ashi.

Paisa video ka ajanga, Moscow-i 2022 küm February Kyiv-i Ukraine nung Russia-i amokbanger aliba tesemtem amaksü atema sentong yangludar ta ashiba ya teyazü aser iba ya Ukraine amaksü atema kuli tejangja ka ama kumdaktsüogo, ta ashi.

Paisa, nürburtem aser tir ashioxtsütsü merangba atema defence ministry aitsüogo aser iba den NATO bloc ajunga den senteper Ukraine-i parnok amaksü renemdar ta otsü meyipsar jembi, ta ashi.

MOLUNGNEN O



Died on 17th June 2023

"Atangji tajung aser taoci kü arishi tepeyong kü sülen anidaksü; aser ni kibuba kidang teti alitsü." Tenüngsang Ken 23:6

Asür Nungsangoba Jamir'er kinungertemi pa shiranga aliba mapang aser iba akümüli wadang tembangba anogo tashi medemer aser kinungertem kwinakti sarasadem, nübu aser rongsen balala agi teyari agütsüogo, nenok ajak dang kanga pelaba lemsateper.

Mejet item lokti tentet dang pelar:

- Unity Ao Baptist Arogo
- Unity Ao Baptist Youth Ministry
- Luyong Baptist Arogo
- Chakhesang Baptist Church
- Unity Village
- Dimapur Molungyimsen Fellowship
- Unity Ao Baptist Women Ministry
- Dimapur Christian Fellowship
- Luyong Baptist Women Ministry
- Molungyimsen Baptist Arogo
- Dimapur Molungyimsen senso Telongjem
- Ao Senso Telongjem Unity Village
- Dimapur Ao Pensioner Union

Rionsanger Putu Molungyimsen
CIHSR Doctors & Nurses
Nenok ajak tenung tetshia tepelaba melemsatetba atema kanga sasar, ajisüaka tulusang Tsungremi nenok ajak mola moshia moajang ta onoki sarasademtsür.

-Temeim Kinungtsü, Chirnur, Semchisemnur aser anükapangtem

Office of the MEJENSANGER PUTU MENDEN WAMEKEN

B.P.O. Wameken. S-1014.

P.O Tuli, Mokokchung, Nagaland. 798618.

"SANGDONGER"

Wameken Putu menden aser Senso Mungdang ajanga 23rd June 2023 anogo, Mr. SENTITEMSU. S/O Mr. IMSUNUKEN (Tzudikong town), pai yimden aser senso anema mapa tamajung inyakba den tenung menuk bentsur arunung, pa Wameken lushi nungi kum ter pongu (15 years) asoshi aridoker.

Iba mapang pa ajanga bener aruba khuret ajak pai abentsu. Adakzüktsüba kum tsungta Wameken lushi nung nisung kari danga pa anenzukdaksura, yimdeni pa/la dang ak ka senchi achitsu lemtetba osang sangdonger.

Sd/-

1. Nungsang Lkr. Tatar.
2. I. Wati Jamir. Tatar.
3. K. Meren Ltr. Tatar.
4. S. Alem Imsong. Tatar.
5. Lanumoa, President, Senso Mungdang.

Mali nungertem temzüng ozüing melenshitsu agizükogo



Linük temzüng ozüing melenshitsu atema mali nungertem referendum ka asoshi vote agütsüogo. Military yimsüsürtemi ashiba agi, iba ajanga election agia civilian yimsüsüba tanaben benoktsü atema lenmang lapoktsütsü.

Bamako, Aami/June 24 (Agencies): Tawa referendum ka agiba sülen Mali nungertem linük temzüng ozüing (constitution) nung temelenshi kar bener arutsü atema agizükogo, koba military

yimsüsürtem aser regional tashitemi ashiba agi, iba ajanga election atema lenmang mesapoktsütsü aser civilian yimsüsüba tanaben benoktsütsü.

Africa anüolen aliba linük indang electoral authority-i

Hokolbarnü ashiba agi, vote agütsür shilem 97-i temelenshi atema vote agütsüogo.

Deobarnü referendum atema linük nung nütsünyongsük million 8.4 aliba nungi shilem 39.4-i vote agütsüogo, ta electoral commission tekolakba Moustapha Cisse-i, Bamako nung result sangdongba mapang ashi.

Transitional council-i benokba temzüng ozüing tasenba ajanga tashi mait aliba political institution tem tashi ita kumdaktsütsü ta temzüng ozüing tasenba pusemertem ashir aser kasa mapang nung iba anemertem, iba ajanga tir nem tashi tali agütsütsü ta ashir.

Temzüng ozüing tasenba kübok tir-i linük policy tem indang telemetba agitsü, koba tang benoka aliba linük temzüng

ozüing kübok sorkar nem tashi agütsür lir.

Kasa mapang nung state tekolakba ket nung Ato Kilonser aser cabinet züngsemtem shimtsü aser mapa nungi anentsütsü atema tashi lir aser sorkari parliament dang masü saka pa nem telangzüba agütsütsü.

Maneni temzüng ozüing nung public finances asüngsashitsü aser ochi mashi inyakyim aziöktsü atema parliament züngsemtem aser senator temi parnok rongsen yimjak nung sangdongtsü nüngdaker.

Poll observers temi vote agütsüba mapang lendong balala atalokba indang osang agütsüogo.

Yimtsüing aika nung polling centre temi telungpurtem aruba sülen yimdaklirtem jenshia aotsüsa aküm aser iba ajanga

inyakyim nung tetsükdaktsü adok aser osettsütem raksa liasü, ta observer temi ashi.

Northern Mali nung Al-Qaeda aser ISIL (ISIS) den sendaktepa aliba telungpurtemi aziöker aliba tesemtem nung vote terara dang agüja liasü.

United Nations aser Economic Community of West African States (ECOWAS) nunger amala lokti tentettemi ashiba agi, referendum ya linük nung civilian sorkar amenoktsü atema military sorkari mulunga ali mali iba indang tetendangba ka lir.

2020 küm August ita telungpurtem maziöktetba atema army ketdangsürtem meita adoka linük tir Ibrahim Boubacar Keita atsüngtoker military yimsüsüba amenok aser tang tashi parnoki yimsüsüba arudar.

FIH Junior WC: India team Korea den asaya asayamung tenzüksü



2023 FIH men's hockey junior world cup nung India team Group C nung December 5 nü South Korea den asaya-a tenzüksü.

Aami/June 24, 2023

(Agencies): 2023 FIH men's hockey junior world cup nung India team Group C nung December 5 nü South Korea den asaya tenzüksü, koba marquee event tenzükba anogo asütsü.

Iba asayamung ya December 16 nü tembangtsü aser asayatem National Hockey Stadium Bukit Jalil nung asayatsü.

Korea aser India na dak alia par telok nung Spain aser Canada nata densema lir. 2021 küm tesüsa iba asayamung Bhubaneswar nung ayongzüka asaya aser India team pezübuba nung tembanga liasü.

Maneni India team December 7 nü Spain den asayatsü aser group stage nung tatembangbuba asaya December 9 nü Canada den asayatsü.

Iba asayamung ya Honibarnü Mercure Living Hotel, Putrajaya nung sentong ka ayongzüka agiba mapang

officially amenoktsüogo.

Malaysia team Group A nung Argentina, Australia, aser Chile den asayatsü aser Group B nung Germany, France, South Africa, aser Egypt ata lir.

Ano Group D nung Netherlands, Belgium, Pakistan, aser New Zealand asayatsü.

Pool ya mezüngbuba junior world rankings dak ajemdaker yangluogo, ta iba asaya achaayangba lokti tentet yai ashi.

Taküm iba asayamung nung team 16 temba jenjang asoshi toktepbba agütsü.

Iba asayamung dak sendakba nung India nunger asayar Uttam Singh-i, India team-i junga asayatsü ta temulung lema bilemba lemsatepogo.

"Sultan of Johor Cup aser Junior Asia Cup nung takok anguba sülen India team kanga temulung lemteta lir aser Malaysia nung Junior World Cup nung takok tajung angütsü

imla atar.

"Malaysia nunger asaya reprangertem tejangraba tulu lir aser iba ajanga asayamung nung shilem agütsü tali tejangraba kümdaktsür aser iba tesemi oa tajungtiba asayatsü matateter," ta Singh-i ashi.

Taoba asayamung nung Argentina team-i iba asayamung trokben koker aliba Germany team koka gold medal angu aser France aser India na tasembuba aser pezübuba nung tembanga liasü.

Junior hockey world cup nung asayaba asayatem ajak arishi küm 21 tekübok asütsüla.

Iba asayamung ya mezüngbuba 1979 küm asaya aser men's junior world cup nung team 12 dang asaya liasü. Ajisüaka 2001 küm nungi team 16 asaya tenzükogo.

2001 aser 2016 küm iba asayamung akokba sülen India team ya Germany aser Argentina na den iba asayamung khen dak timbaben akokba team lir.

Mumbai City FC aser Vinit Rai na tenangzüktepbba yangluogo

Aami/June 24, 2023

(Agencies): Mumbai City FC-i Vinit Rai teti atema alizükogo, shiba loan nung asaya liasü. Arishi küm 25 tain midfielder yagi club den tenangzüktepbba yangluba sülen pa ano club nungi küm ka asayatsü.

Assam nung asoba midfielder ya mezüng 2022 küm January ita Odisha FC nungi loan nung arua Mumbai nung aden aser Mumbai City FC pur 2022 AFC Champions League campaign densema club tenüng nungi tetoktepbba balala nung asaya 14 nung shilem agia liasü.

Iba sülen Mumbai-i ano küm ka atema Vinit loan nung meshizük aser 2022-23 season nunga pa club nungi asaya liasü. Mumbai puri Indian Super League Shield akokba nung Vinit-i tongtibang shilem agi. Pa asaya 11 nung asaya aser Chennaiyin FC aser North East United FC den asayaba mapang goal kaka idakja liasü.

Vinit ya Tata Football Academy nungi anitetba asayar ka lir aser pa ISL nung mezüngbuba 2016 küm asaya aser tang tashi nung league asaya 90 nung asayaogo. Pa Kerala Blasters aser Delhi Dynamos nungi asayaba sülen

Odisha FC nung aden aser iba sülen Mumbai-i oa liasü.

"Mumbai City nungi ano küm ka asayatsü atema kanga pelar. Iba club nungi asayaba mapang tajangshibatem aser tangazükbatem ajanga ni renloka aoba nung teyari tulu agütsüogo. Coach Des, par staff aser club nung sendak alir ajaki ni bendanga agüja nongitogo aser taoba season ama club-i takok tajung ngutettsü atema takokba tashi teyari agütsütsü. Iba team nung densema ya maangka tulu ama agir aser club aser fan tem atema maneni meranga inyaksü ni renema lir," ta Vinit Rai-i ashi.

"Vinit-i taoba season ana nung pa dak sempet tajung aliba sayuogo aser pa taruba season nung tongtibang asayar ka asütsü. Pai kanga atasa meranga inyakogo aser onoki pa koma asayadaktsüner yamaji asayatsü atema angazükogo. Vinit taruba season nunga club nungi asayatsü atema mulungtetba atema kanga pelar aser pai junga asayatsü imlar atar," ta Mumbai City FC head coach Des Buckingham-i ashi.

Bournemouth-i Roma nungi Justin Kluivert alizükogo

Aami/June 24, 2023

(Agencies): Bournemouth-i Dutch nunger winger Justin Kluivert, Serie A club AS Roma nung-i alizükogo, ta club sangdong ka ajanga Hokolbarnü metetdaksü. Pa den küm aika atema tenangzüktepbba yangluogo, ajisüaka pa sen kwi agi alizük iba indang osang tejangja magütsü.

Kluivert ya taoba mapang Netherlands nunger striker Patrick Kluivert'er jabaso lir aser osang ajanga ashiba agi pa pound million 9.6 agi alizükogo.

Kluivert tebu dang masü saka par kinungertem aika football asayatem lir. Tebou Kenneth, international jenjang nung Suriname nungi asayaogo, tenu tanobusang Ruben Eredivisie nung FC Utrecht nungi asayar aser pa indang half-brother Shane, Barcelona academy nung asayadar.

Arishi küm 24 tain asayar ya taoba season loan nung oa LaLiga club Valencia nungi asaya, kong pai asaya 29 nung goal ti idakja liasü.

"Season tasen metenzük tsüingda Justin tama alizükogo aser iba atema onok kanga pelar," ta Bournemouth chief

executive Neill Blake-i ashi.

"Pa Europe nung club aikati alizüküna liasü saka pa idaki aruba ajanga pa nukjidong sayur koba onok nukjidong den kasa lir.

"Justin ya kanga jangrademtsü aketba aser tasa balala aketba attacking asayar ka lir shibai goal idaktsütsü asoshi rangloker asayar. Pa kanga tekara aser technical sempet tajung keta lir," ta pai ashi.

Kluivert, shiba national team nungi anaben asayaogo aser Bundesliga club RB Leipzig aser Ligue 1 team Nice nungia loan nung oa asayaogo.

Premier League nung asayatsü telemtetba agiba sülen pa UEFA indang top six coefficient nations nungi asayar asütsü.

Kasa sangdong ajangsa Bournemouth-i ashiba agi, asayar ya taruba ita pre-season tetenzüklen training camp ka atema Marbella-i mao tsüingda team nung adentsü.

Bournemouth pur Marbella nung July 16 nü Maccabi Tel Aviv den asayatsü aser iba sülen hopta ana lir Atalanta den asayatsü aser August 5 nü Lorient den asayatsü.

Duleep Trophy atema North-East Zone team sangdongogo



Dimapur, Aami/June 24

(TYO): Duleep Trophy 2023-24 atema North-East Zone squad sangdongogo, kong Nagaland nungi asayar asem densema lir aser NE zone ya Nagaland nungi asayar Jonathan Rongsen lenisüba nung asayatsü.

Nagaland Cricket Association-i ayongzüka June 12 nungi 24 tashi Nagaland Cricket Academy, Sovima, Chumoukedima nung Conditioning Camp ka agiogo. BCCI Domestic Season 2023-24 ya Duleep Trophy asaya tenzüksü. North East team iba asayamung nung

shilem agütsü atema Deobarnü (25-06-2023) Bengaluru-i aotsü, kong parnok M.Chinnaswamy Stadium, Bangalore nung June 28 nungi July 1 nü tashi North Zone den asayatsü.

North-East Zone squad yamai alitsü:

- Jonathan Rongsen (captain)- Nagaland
- Nilesh Lamichaney- Sikkim
- Kishan Lyngdoh- Meghalaya
- Langlonyamba- Manipur
- A.R. Ahlawat- Arunachal
- Joseph Lalthankhuma- Mizoram
- Pukhrambam P. Singh-

Manipur

- Dipu Sangma- Meghalaya
- Jotin Pheiroijam- Manipur
- Imliwati Lemtur- Nagaland
- Palzor Tamang- Sikkim
- Kishan Singha- Manipur
- Akash Kumar- Meghalaya
- Raj Kumar Rex Singh- Manipur
- Nagaho Chishi- Nagaland

Support Staff:

- Sonam Palden Bhutia - Head Coach (Sikkim)
- Vikash Singh Chauhan - S&C Coach (Meghalaya)
- Thongam Kamlesh- Physio (Manipur)
- Dister M Marbaniang- Team manager (Meghalaya)

BILEMDANGANG

"Azümesenertem asoshi mapa ajak tasak."